

**BOSNA I HERCEGOVINA
FEDERACIJA BOSNE I HERCEGOVINE
KOMISIJA ZA VRIJEDNOSNE PAPIRE
FEDERACIJE BOSNE I HERCEGOVINE**

Na osnovu člana 38. stav (9), člana 39. stav (5), člana 40. stav (3) i člana 41. stav (5) Zakona o dobrovoljnim penzijskim fondovima („Službene novine Federacije BiH“, broj 104/16) i člana 12. Zakona o Komisiji za vrijednosne papire („Službene novine Federacije BiH“, broj 39/98, 36/99, 33/04, 92/13 i 6/17), Komisija za vrijednosne papire Federacije Bosne i Hercegovine, na 545. sjednici održanoj dana 23.11.2017. godine, donijela je

**Pravilnik
o prestanku društva za upravljanje dobrovoljnim penzijskim fondom i prenosu prava
upravljanja**

Opće odredbe

**Član 1.
(predmet pravilnika)**

Ovim pravilnikom bliže se uređuje postupak prestanka društva za upravljanje dobrovoljnim penzijskim fondom (u daljem tekstu: društvo za upravljanje), uslovi i način izbora najpovoljnije ponude društva za upravljanje, postupak raspuštanja dobrovoljnog penzijskog fonda (u daljem tekstu: fond) i prenos prava upravljanja.

**Član 2.
(primjena odredaba)**

- (1) Na prestanak rada društva za upravljanje po osnovu stečaja, prinudne likvidacije ili oduzimanja dozvole za rad i u drugim slučajevima određenim zakonom primjenjuju se odredbe Zakona o dobrovoljnim penzijskim fondovima („Službene novine Federacije BiH“, broj 104/16 - u daljem tekstu: Zakon), drugi zakoni i ovaj pravilnik, a na prestanak rada društva za upravljanje usljed dobrovoljne likvidacije odnosno po njegovoj odluci i postupak raspuštanja fonda primjenjuju se odredbe Zakona i ovog pravilnika.
- (2) Na postupak izbora novog društva za upravljanje primjenjuju se odredbe Zakona i ovog pravilnika.
- (3) Kod dobrovoljne likvidacije primjenjuje se odjeljak ovog pravilnika koji se odnosi na dobrovoljni prestanak društva za upravljanje.
- (4) Kod stečaja i prinudne likvidacije primjenjuje se odjeljak ovog pravilnika o postupanju kod oduzimanja dozvole društvu za upravljanje.

Dobrovoljni prestanak društva

**Član 3.
(odluka o prestanku rada)**

- 1) Društvo za upravljanje čiji je nadležni organ donio odluku o prestanku rada tog društva za upravljanje dužno je ovu odluku narednog dana dostaviti Komisiji za vrijednosne papire Federacije Bosne i Hercegovine (u daljem tekstu: Komisija) i o toj odluci obavijestiti banku depozitara.

- 2) Društvo za upravljanje, prije realizacije odluke iz stava 1. ovog člana, dužno je provesti postupak izbora društva za upravljanje i izvršiti prenos svog prava upravljanja dobrovoljnim penzijskim fondom (u daljem tekstu: fond) na izabrano društvo za upravljanje.

Član 4. (javni poziv)

Društvo za upravljanje upućuje javni poziv drugim društvima za upravljanje da, u roku 15 dana od dana objavljivanja javnog poziva, podnesu ponudu za upravljanje fondom, odnosno za pripajanje fonda.

Član 5. (prilozi uz ponudu)

- (1) Društvo za upravljanje koje društvu za upravljanje podnese ponudu za upravljanje fondom, odnosno za pripajanje fonda, uz ponudu dostavlja:
- a) pismo o svojim namjerama, koje uključuje aktivnosti u vezi sa fondom kojim će upravljati, odnosno koji će se pripojiti;
 - b) plan svog poslovanja, koji uključuje i plan poslovanja fonda za koji je podnijelo ponudu;
 - c) firmu banke depozitara s kojom će zaključiti ugovor o obavljanju poslova banke depozitara za fond kojim će upravljati;
 - d) spisak lica koja će obavljati odgovorne poslove u društvu za upravljanje;
 - e) investicionu politiku fonda kojim će upravljati;
 - f) naknade koje će naplaćivati članovima fonda kojim će upravljati, sa naznakom roka u kojem se te naknade neće povećavati;
 - g) drugu dokumentaciju kojom se uređuju međusobni odnosi.
- (2) Društvo za upravljanje može od društva za upravljanje koje podnosi ponudu iz stava (1) ovog člana tražiti i drugu dokumentaciju potrebnu za odlučivanje o toj ponudi.

Član 6. (izbor ponude)

- (1) Kod izbora najpovoljnije ponude iz člana 5. ovog pravilnika društvo za upravljanje uzima u obzir ispunjavanje uslova i kriterija kao načina izbora najpovoljnije ponude, cijeneći dokaze iz člana 5. ovog pravilnika.
- (2) Uslov za izbor najpovoljnije ponude je da nisu protiv društva za upravljanje i odgovornih lica u društvu za upravljanje preduzimane mjere iz nadzora u skladu sa Zakonom.
- (3) Kod kriterija društvo za upravljanje vrši izbor najpovoljnije ponude:
- a) na osnovu strategije poslovanja, odnosno ciljeva i smjernica društva za upravljanje, njihove profitne, finansijske i operativne stabilnosti, tendencija u poslovanju, odnosno finansijskom stanju, kao i mogućnosti osiguranja dodatnog kapitala;
 - b) na osnovu poslovne reputacije društva za upravljanje i njegovih dioničara, njihovog cjelokupnog dotadašnjeg poslovanja i upravljanja fondovima, sposobnosti društva za upravljanje da upravlja rizicima, njegove kadrovske, organizacione i tehničke osposobljenosti, kao i na osnovu toga da li će se njihovim djelovanjem dugoročno pozitivno uticati na poslovanje fonda i drugih podataka;
 - c) na osnovu visine predloženih naknada koje će društvo za upravljanje naplaćivati;

- d) na osnovu visine ostvarenih prinosa u upravljanju drugim fondovima u odnosu na preuzeti rizik i druge poslovne rezultate;
- e) na osnovu dužine poslovanja društva za upravljanje;
- f) na osnovu posljedica koje preuzimanje, odnosno pripajanje fonda može izazvati na tržištu;
- g) na osnovu toga da li će preuzimanjem biti adekvatno zaštićeni interesi njegovih članova.

Član 7. (donošenje odluke)

Društvo za upravljanje na osnovu dokumentacije iz člana 5. i kriterija iz člana 6. ovog pravilnika donosi odluku o izboru najpovoljnije ponude i o tome obavještava sva društva za upravljanje koja su dostavila ponudu, a sve u roku od 30 dana od isteka roka iz člana 4. ovog pravilnika.

Član 8. (obavještavanje članova)

Društvo za upravljanje koje je dobilo dozvolu za upravljanje fondom dužno je da, u roku od osam dana od dana prijema rješenja o toj dozvoli, svim članovima fonda dostavi obavještenje o njihovom pravu da, ako ne žele da budu članovi fonda kojim upravlja to društvo za upravljanje, svoj račun prenesu u fond kojim upravlja drugo društvo za upravljanje u roku od 60 dana od dana prijema tog obavještenja, pri čemu troškove ovog prenosa snosi društvo za upravljanje koje preuzima, odnosno pripaja fond, a uz obavještenje društvo za upravljanje svim članovima fonda dostavlja ugovor o članstvu u fondu.

Postupanje kod oduzimanja dozvole društvu za upravljanje

Član 9. (prestanak upravljanja)

Danom oduzimanja dozvole društvo za upravljanje prestaje sa upravljanjem fondom, a prava upravljanja prelaze na banku depozitara s tim da banka depozitar može vršiti samo neodložne poslove u skladu sa članom 39. Zakona.

Član 10. (uslovi i način izbora najpovoljnije ponude)

Na uslove i način izbora najpovoljnije ponude od strane Komisije i obavještavanje članova fonda primjenju se čl. 5., 6. i 8. ovog pravilnika.

Raspuštanje fonda

Član 11. (nepodnošenje ponuda)

(1) Ako na javni poziv nijedno društvo ne podnese ponudu društvo za upravljanje kod dobrovoljnog prestanka društva obavještava Komisiju, a Komisija dostavlja banci depozitaru ovlaštenje da unovči imovinu fonda i račune članova fonda prenese u druge fondove, o čemu istovremeno obavještava i članove fonda.

(2) Komisija postupa na način iz stava 1. ovog člana i kada je društvu za upravljanje oduzeta dozvola.

(3) Obavještenje iz st. (1) i (2) ovog člana društvo za upravljanje odnosno Komisija objavljuje u najmanje jednom dnevnom listu koji se distribuira na području Federacije Bosne i Hercegovine.

Član 12. **(postupanje banke depozitara)**

(1) Banka depozitar, u roku od šest mjeseci od dana prijema ovlaštenja iz člana 11. ovog pravilnika, unovčava imovinu fonda u najboljem interesu njegovih članova.

(2) Banka depozitar je dužna Komisiji jednom mjesečno podnositi izvještaj o unovčavanju imovine i prenosu računa fonda.

(3) Banka depozitar ima pristup dokumentaciji fonda koji se raspušta u roku iz stava (1) ovog člana.

Član 13. **(drugi fond i prenos računa)**

(1) U roku od 30 dana od dana dostavljanja obavještenja iz člana 11. st. (1) i (2) ovog pravilnika, članovi fonda biraju drugi fond i obavještavaju banku depozitara o svom izboru.

(2) Račune članova fonda koji u roku iz stava (1) ovog člana ne obavijeste banku depozitara o svom izboru banka depozitar prenosi u postojeće fondove, srazmjerno njihovom učešću na tržištu, mjereno neto imovinom tih fondova, uzimajući u obzir starost članova, visinu akumuliranih sredstava i aktivnost uplata.

(3) Troškove banke depozitara u vezi sa unovčavanjem imovine i prenosom računa članova fonda nadoknađuje društvo iz člana 3. ovog pravilnika, a ako to nije moguće, ovi troškovi se nadoknađuju iz imovine fonda u iznosu na koji Komisija da prethodnu saglasnost.

Prenos prava upravljanja fondom

Član 14. **(objava informacije o prenosu)**

(1) Društvo za upravljanje prenositelj i društvo za upravljanje preuzimatelj dužni su u roku od osam dana od zaprimanja saglasnosti Komisije za prenos poslova upravljanja fondom, svaki na svojoj internetskoj stranici na vidljivom mjestu objaviti informaciju o prenosu poslova upravljanja fondom, koja će sadržavati najmanje podatke iz stava (2) ovog člana.

(2) Društvo za upravljanje prenositelj dužno je u roku od 15 dana od dobivanja saglasnosti Komisije za prenos poslova upravljanja fondom, obavijestiti sve članove u fondu koji se prenosi o sljedećem:

- a) društvu za upravljanje koje preuzima upravljanje fondom;
- b) svim postupcima i radnjama koje će se preduzeti u vezi s prenosom poslova upravljanja;
- c) roku u kojem će se poslovi upravljanja prenijeti na društvo za upravljanje preuzimatelja;
- d) pravima članova fonda koji se prenosi, u postupku prenosa poslova upravljanja, a naročito o pravu na neplaćanje naknade za izlaz;
- e) pravnim posljedicama prenosa upravljanja fondom.

(3) Društvo za upravljanje prenositelj će obavijest iz stava (2) ovog člana dostaviti članovima fonda koji se prenosi na jedan od sljedećih načina:

- a) putem elektronske pošte, ako je član društvu za upravljanje dostavio valjanu adresu elektronske pošte te je odabrao takav način dostave podataka; ili
- b) poštanskom pošiljkom.

Član 15.
(poslovi koje je nemoguće odgoditi)

Poslovima upravljanja fondom koji se ne mogu odgađati, smatraju se, primjerice:

- a) poslovi zbog kojih bi, da ih banka depozitar ne obavi za fond nastala šteta;
- b) administrativni poslovi iz Zakona.

Član 16.
(sadržaj, način objave i dostave informacija kod oduzimanja dozvole)

(1) Banka depozitar koja privremeno upravlja fondom koji se prenosi dužna je u roku od osam dana od zaprimanja saglasnosti Komisije za prenos poslova upravljanja fondom, na svojoj internetskoj stranici na vidljivom mjestu, objaviti informaciju o prenosu poslova upravljanja, koja će informacija sadržavati najmanje podatke iz stava (3) ovog člana.

(2) U roku iz stava 1. ovoga člana, informaciju o prenosu poslova upravljanja koja sadrži podatke iz stava 3. tač. a), c) i d) ovog člana objavit će i društvo za upravljanje preuzimatelj na svojoj internet stranici.

(3) Banka depozitar koja privremeno upravlja fondom koji se prenosi dužna je u roku od 15 dana od dobivanja saglasnosti Komisije za prenos poslova upravljanja fondom obavijestiti sve članove fonda koji se prenosi o sljedećem:

- a) razlogu prenosa poslova upravljanja;
- b) izabranom društvu za upravljanje koje preuzima upravljanje fondom te kriterijima pri tom izboru;
- c) svim postupcima i radnjama koje će se preduzeti u vezi s prenosom poslova upravljanja;
- d) roku u kojem će se poslovi upravljanja prenijeti na društvo za upravljanje preuzimatelja;
- e) pravima članova fonda koji se prenosi, u postupku prenosa poslova upravljanja.

(4) Obavijest iz stava (3) ovog člana, banka depozitar će dostaviti članovima fonda koji se prenosi na jedan od sljedećih načina:

- a) putem elektronske pošte, ako je član društvu za upravljanje ili banci depozitaru dostavio valjanu adresu elektronske pošte te je odabrao takav način dostave podataka; ili
- b) poštanskom pošiljkom.

(5) Kako bi se ostvarile pretpostavke za obavješćavanje članova u skladu sa stavom (4) ovoga člana, od trenutka oduzimanja dozvole društvu za upravljanje, društvo za upravljanje čijim se fondovima prenosi upravljanje, dužni su omogućiti banci depozitaru kontinuirani uvid u registar članova.

(6) Pored prava na naknadu, banka depozitar ima pravo i na pokriće opravdanih troškova koje je imala (troškovi obavješćavanja članova), koji će se troškovi namiriti iz imovine fonda.

Završna odredba

Član 17.
(stupanje na snagu)

Ovaj pravilnik stupa na snagu osmog dana od dana objavljivanja u „Službenim novinama Federacije BiH“.

Broj: 01- 02- 2474/17
Sarajevo, 23. novembar 2017. godine.

Predsjednik
Komisije za vrijednosne papire
Federacije Bosne i Hercegovine
mr. Hasan Čelam